

Poldi Galesiyahidok pepa youyemguk

Yodakale Mede

Wapum'walaŋ Mede Momooŋ tububihila yohautagiŋ uŋaniŋ adi Judahidi hogok kayoŋbop mintagiŋ, ala mindaŋkade Judahi'walaŋ feknit mokitdi maan kayoŋbop mintagiŋ. Unduŋ tubune malabumuŋ niŋ mintaguk e indiŋ. Timeŋ Judahi'walaŋ feknit mokit adi yadi Moses'walaŋ Yodoko Mede mu keleyagiŋ. Ala kobuk kayoŋbop mintagiŋ doktiŋa Moses'walaŋ Yodoko Mede u kedembe keleyaneŋ be dediŋ, yoŋa welemulap kisaŋ tigiŋ.

Judahi nolidi Judahi'walaŋ feknit mokit kayoŋbop mintagiŋ adi me sigihik diki foloŋ fek titiŋdok yeniŋgigine tigiŋ. Tiŋa undugoŋ Moses'walaŋ Yodoko Mede maan takalidok yeniŋgiŋ. Unduŋ yobune Poldi medehik u ula indiŋ yeniŋguk. Hidi metam didimehi mintane nadiŋa u Yodoko Mede kelekele talik gineŋ moon, adi tobo Jesu nadisukilitimiŋa Bepaŋ namanda foloŋ metam didimehi mintadok. Unduŋ yogiŋ iŋgoŋ Judahi nolidi Galesiya yokwetneŋ wooŋ kayoŋbop uŋoŋ hatigiŋ Moses'walaŋ Yodoko Mede keledok yeniŋgigine tigiŋ. Unduŋ tigiŋ kaŋ Pol adi kahathik u nadiŋa titiŋhik eŋ nadisukilitihik tubudidimeŋ tubukilitiŋa hatineŋdok pepa i youyemguk.

Tiŋa Poldi indiŋ maan yeniŋguk. Ne adi Bepaŋdigoŋ Aposel kwanai titiŋdok nindapmaguk. Adi ne'walaŋ be me niŋ'walaŋ nadinadi mu keleguk. Adi Bepaŋ negoŋ kutiniŋa Judahi'walaŋ feknit mokit lekiŋgoŋhik gineŋ hatiŋa Mede Momooŋ yenhautadok niŋguk. Tiŋa yeniŋguk, metam nediyeŋ Kilisto Jesu nadisukilitimiŋ adi hogok Bepaŋ namanda foloŋ metam didimehi hatiŋ. Eŋ mede yohepdok indiŋ yeniŋguk. Wapumdi folofolok gineniŋ nihifiyatak eŋ Uŋgoŋiŋ Munabulidi hatihatiniŋ tubudidimelak kaŋ indi notniyedok titiŋ momohi tiyemam.

Pepa yendiniŋ maaneŋ mede mebi indiŋ haliwiŋiŋ:

Fiye 1-2 Poldi Mede Momooŋ kwanai hati tuguk uyadi Wapum negoŋ nindidimeune tuguk.

Fiye 3-4 Yodoko Mededok talik eŋ Nadisukilitidok talik keledok wondiniŋ mebi.

Fiye 5-6 Yesu adi folofolok hogoli fiyakutniŋguk doktiŋa adi kubugoŋ nadisukilitimiŋa hatihati fafaŋeniŋ kahileneem.

Yodakale eŋ yokahanŋ

1 ¹Nu aposel Pol, nu me niŋdi mu naniŋkukiŋ, eŋ me niŋdi kwanai-medede mu naniŋgiŋ. Adi Jesu Kilisto eŋ Betnik Bepaŋ Jesu kumuŋ gineniŋ tubukaikagukdi kwanai-medede nanimbu tilat. ²Na eŋ notneye noli nukut hatiŋ indi Galesiya kwetneŋ kayoŋbop hatiŋ hiditok pepa i kamehamam.

³Bepaŋ Betnik eŋ Wapumnik Jesu Kilisto adi'walaaniŋ siloŋ tobogoŋ, eŋ kulemadi hidut haliwoŋ halaak. ⁴Jesu adi Betnik Bepaŋ'walaŋ nadihebet tuguk u takaliguk. Tiŋa kwetfoloŋ hatihati hogoli i hatiyamneniŋ nihikibidalene kadakaniniŋnikdok kibikoŋ u negoŋ kumuŋguk. ⁵Unduŋ doktiŋa helemahemanŋ adi'walaŋ wougigit nintilone haliwoŋ halaak. U Biyagoŋ.

Nebek niŋ adi Mede Momoŋ tubufila niŋ yobaak adi yadi hamdok gigit tibaak

⁶Hidi yadi Kilisto'walaŋ siloŋ tobogoŋniŋdi hanihehimaneguk, iŋgoŋ hidi adut yagigi mu hatigiŋ, hidi adi pilap bikabuŋa mede taliŋ niŋ'walaŋ ginenŋ magi kametnadi tiŋ, nu wondoktiŋa boho hinek tilat. ⁷Iŋgoŋ oŋ, mede momoŋ gitipmuŋgoŋ noli daŋ hatak? U moŋ hinek. Wadi hogoku meeniŋ nolidi wele tubufit tihamuŋa Kilisto'walaŋ Mede Momoŋ u tubufit tihamiŋ, u hogoku-ku tilak oŋ.

⁸Unduŋ doktiŋa indibe, be kunum gineniŋ aŋelo niŋdi Mede Momoŋ haniŋit u tubufila niŋ nobu hanimbaak adi yadi hamdok gigit tibaak. ⁹Mede u youlat uŋakoŋ kotigoŋ youtat. Nebek niŋdi Mede Momoŋ hanihehitubu-didimeŋit u tubufila niŋ hanimbaak adi yadi hamdok gigit tibaak.

¹⁰Kaŋ dedinŋ, mede i yolat uyadi meeniŋdi nabune utumbadok be Bepaŋdi nabune utumbadok yolat? Nu meeniŋdi nadinambune utumbadok nadiŋa kwanainewe tugut binek, dedinŋ tiŋa Kilisto'walaŋ tipilapilaye-me hatilit?

Pol ne'walaŋ hatihati diniŋ mede

¹¹Notneye, nu mede indinŋ hanimbe nadineŋ. Mede Momoŋ haniŋgut uyadi meeniŋdi'walaaniŋ moŋ. ¹²Tiŋa undugoŋ, meeniŋdi nanindidime mu tiŋiŋ, uyadi Jesu Kilisto negoŋ nanimbihila nanindidimeguk.

¹³Nu koomkwaha Judame heki'walaŋ baŋamneŋ hatiŋila nemek tugut, u hidi agaŋ nadiŋ. Nu Bepaŋ'walaŋ Kayoŋbopniŋye widihi yehikele tiŋa kisaŋ yehitubu-kadakagut. ¹⁴Uyadi indinŋ yoŋa tulugut. Judahi'walaŋ titiŋ hogohogok u mu bikabune fowaak yoŋa fafaŋe hinek tugut. Tiŋa mekuyahi notneye'walaŋ titiŋ u nu'walaŋdi yalakapmeŋ hinek tuguk.

¹⁵Kaŋ Bepaŋ adi koom maŋ weleneŋ hatuwene nabukahileeŋ kulema eŋ siloŋniŋ doktiŋa naninehimantigukdi nabune tuwot

tubune ¹⁶Mihinjij'walaŋ Mede Momooŋ u meeniŋ Judahi'walaŋ feknit mokit'walaŋkade yohautadok ne'walaŋ mebiŋiŋ nanimbihila nanindidimeguk. Unduŋ tinambune nu kwetfoloŋ meeniŋ noli yeninadi mu tugut. ¹⁷Tiŋa undugoŋ, Jelusalemde looŋ aposel tububihila hatigiŋ adi mu yabugut. Moŋ, nu yadi Alabiya kwetneŋ wooŋ hatigene kotigoŋ udaneŋ Damasko yokwetneŋ bugut.

Pol adi Jelusalem yokwetneŋ looŋ hatiguk

¹⁸Hatibene gulet 3 dapmaune Pita^a kawit yoŋa Judiya kwetneŋ Jelusalemde looŋ melenai 15 wondok tuwot adut uŋgoŋ hatigut. ¹⁹Uŋaniŋ aposel noli mu yabugut, Wapum kwayaŋ Jems hogok kagut. ²⁰Mede i youtat adi Bepaŋ'walaŋ namanda foloŋ biyagoŋ yoŋa youtat. ²¹Unduŋ tiŋa Siliya eŋ Silisiya kwetneŋ wooŋ hatigut. ²²Eŋ Judiya kwetneŋ Kilisto'walaŋ kayoŋbop hatigiŋ adi yadi mu nabugiŋ. ²³Adi yadi nu'walaŋ mede kahat indiŋ hogok nadigiŋ. "Nindihi nihikele tinimiŋa Mede Momooŋ tubuliwe titiŋdok yogukdi meeniŋ Mede Momooŋ uŋakoŋ hinek hati yenihautalak." ²⁴Unduŋ yoŋa nutok tiŋa Bepaŋ niutumbagiŋ.

Poldi Jelusalem yokwetneŋ wooŋ Aposel noli yabuguk

2 ¹Hatigene gulet 14 dapmaune Banabas gut Jelusalemde kotigoŋ logumut. Nai uŋaniŋ Taitus maŋ nagila wanakaŋ logumun. ²Ala woŋ adi hogok mu tugut. Wapumdi mede nanimbihila walane tubulodaune logut. Looŋ meeniŋ Judahi'walaŋ feknit mokit u Bepaŋ'walaŋ Mede Momooŋ yenihautalat wondiniŋ mede kahat tiyemgut. Uyadi me talitimeŋ wapuhi nehi hogok yehibopneŋ yeniŋgut. Maŋgoŋde, adi nadiune tuwot mu tubune kwanai tifat tugut unduŋ tibaakneŋ yoŋa kahat wanakaŋ tiyemdapmagut. ³Unduŋ tibene nadiŋa kedem yogiŋ.

Eŋ me notne Taitus adi Gilikniŋ, iŋgoŋ Judahi'walaŋ fek timindok mu yogiŋ. ⁴Malabumuŋ indiŋ hakuk doktiŋa. Me noli Jesu nadisukiliti hinek mu timiŋgiŋ heki adi indi'walaŋ kayoŋbopnik gineŋ uŋgoŋ fooŋ hatigiŋ. Hatiŋila Jesudi Yodoko Mede diniŋ folok gineniŋ nihifiyali titiŋ momohi nimguk, u hati tane kabup kanadi tigiŋ. Me heki uyadi ninigilune Yodoko Mede diniŋ tipilapilaye kwanai kotigoŋ titiŋdok nadiŋa unduŋ tigiŋ. ⁵Biyagoŋ kuyoŋ, adigoŋ nihitiŋafofonŋdok yobune indi Jesu'walaŋ Mede Momooŋdi hidi'walaŋkade giyoŋgiyone tibaakneŋ yoŋa mu nadikulema-yemiŋgumun.

Aposel nolidi Pol kwanaiŋdok nadiune tuwot tuguk

⁶Kaŋ me talitimeŋ heki wohiyehinit adi kwanai tilat wendok mede gitipmuŋ nemu tomboyoutnamgiŋ. (Nu yadi adi wohiyehinit wondok

^a 1:18 Wou noli Sifas.

nadibedi mu tilat. Bepañ adi metam indi'walañ welenik kanadi tilak.)
 7Kañ biyagon, me talitimej hekidi indin nadigin. Bepañdi Pita meeniñ fekhinit lekingonhik folon Jesu'walañ Mede Momoonj yohautadok kwanai-medede ninguk, undugon nu maan meeniñ fekhinit mokit'walañ lekingonhik folon yohautadok kwanai-medede naninguk. 8Tiña Pita tubulodaune kwanai tubune foloronit tuguk undugon nu maan nehitudubulodaune kwanai tibene foloronit tuguk. 9Kañ Wapumdi kwanai dinin sanjiniñ silon tinimguk u kadakaleen Jems, Pita ej Jon, Jesu'walañ kayonjopdi talitimej wapuhi yeniyagin, adi Banabas indi menot tinimiña kohokukut tinimgin. Unduñ tiña indi meeniñ fekhinit mokit adi'walañkade kwanai tadene, nehi adi meeniñ fekhinit'walañkade kwanai titindok yogin. 10Unduñ tiña mehimehiye fiyewakahi yehitudubulodadok hogok niningin. Biyagon kuyon, nu wendogon tiña mede kwanai fafañe tiña tilat.

Pitadi nemek tubune kadakaguk

11Hatigene Pitadi Antiyok yopmañ buña nemek hogoli tubune kawene tuwot mu tubune mede daulebebe ningut. 12Adi yadi timej feknit mokitdi Imeyout tigin adut ila nanaje naguk. Kañ Jems'walañ noliniye adi busuwaune yabuña Judahi'walañ fek titindok gigne tigin aditok muntaañ fekhinit mokitdi Imeyout tigin biyabuña woonj molomgon hatiguk. 13Yalayañ unduñ tiñila woonjalin buñagalin tubune Judame nolidi maan undugon tigin. Kañ Banabasdi yabuña undugon tiña talik fai uguk.

14Unduñ tiña Jesu'walañ Mede Momoonj dinin talii didimeningon mu takaliune yabuña meeniñ noli namandahik folongon Pita indin ningut. "Du yadi Judamedigon Judame indi'walañ titin gineñ mon, meeniñ fekhinit mokit adi tiin unduñ tihatilañ, undinindi mangande fekhinit mokitdi Judame indi'walañ titin u titindok hati yolañ? 15Indi yadi meeniñ fekhinit mokit hogok hatifit tiin undihi mu mintagumun, Judame mintagumun. 16Ingon on, indin nadiyah. Meeniñdi Yodoko Mede takaliña tuwot mu walandadok. Kañ Kilisto adi Yodoko Mede tilolon doktiña mon, adi nadisukilitinik doktiña nihitudubulandadok nadiña, indi maan Jesu nadisukilitimiyam. Yodoko Mede doktiña walandadok tuwot mu tilak."

Jesu nadisukilitimiña yomnit mokit titindok

17Kañ Kilisto'walañkade woonj galiña walandadok yoyamdi kadakanin nobu tiña dedin yodok? U Kilistodi kadakanin titindok niningiginelak be? Mon, unduñ mu hatak. 18Nu nemek hogohi kotigon mu behatidok yogut ingon kotigon mongola behatiña yalañ-me tibit. 19Nu Yodoko Mede gineñ kumungut wonj adi Yodoko Mede doktiña kumungut. Kañ nai indidegon

adi Bepaŋ doktiŋa hatilat. ²⁰Nu yadi agaŋ Kilisto gut kolonɔdabek folon nukin. Kaŋ i hatilat adi na'walaŋ moŋ, adi Kilistodi walane maaneŋ hatilak. Foloone gitnem dut hatihati uyadi hatilat ala Bepaŋ mihiniŋ nadisukilitimiŋa aditok hogok hatimilat. Biyagoŋ kuyoŋ, adigoŋ welesilon tinamuŋa hatihatiŋiŋdi nutok kibikoŋ kameguk. ²¹Nu Bepaŋ'walaŋ silon tobogoŋ u mu lahutat. Yodoko Mede tagimneŋ walandadok talik binek hatuwek adigili Kilisto adi kumunfit tuguk yoyanim.

Yodoko Mede diniŋ talik kelegin

3 ¹O Galesiyahi metam kaulehi! Hidi nediyeŋ wele tubufit tihamguk? Jesu Kilisto kolonɔdabek foloŋ ukiŋ adi'walaŋ folonamandap hanindidimewe dauhik folooŋ hinekdi kagiŋ. ²Yoŋ adi nemek kubugoŋdok haninadiwit. Munabuli moŋgokiŋ u dediŋ tiŋa moŋgokiŋ? Yodoko Mede be takaliŋa moŋgokiŋ, be Mede Momooŋ nadiŋa nadisukilitiŋa moŋgokiŋ? ³Maŋgoŋde nadikaule tihatiŋ? Munabuli diniŋ talik tububihila kelegin ala me'walaŋ saŋiniŋ moŋgolaŋa Munabuli'walaŋkade deti wooŋ gali fafaŋeneŋ? ⁴Folofigita wapum nadigiŋ uyadi hogok mintahamfit be tuguk? Biyagoŋ, folooŋnit mokit nobu tuguk kaŋ. ⁵Munabuli hamuŋa yagithik tubukedebakedeba tihamulak eŋ Bepaŋ'walaŋ kudi noli tihamulak, adi Yodoko Mede takalidok be nadisukiliti tiŋa Mede Momooŋ nadiŋ wendoktiŋa tilak?

Abalaham'walaŋ talik keledok

⁶Abalaham adi undugoŋ timiŋit. Adi yadi Bepaŋ nadisukilitimimbune me didimeniŋ niŋguk. ⁷Unduŋ doktiŋa indiŋ nadineŋ. Nadisukilitihiniŋ adi Abalaham'walaŋ yalakiŋiye folooŋ. ⁸Meeniŋ fekhiniŋ mokit adi Bepaŋ nadisukilitimimbune yomhik dapmaune yehitubu-didimewaak, biyagoŋ kuyoŋ, unduŋ degoŋ tiŋa koomkwaha nadisuŋa Abalaham'walaŋ gigitmede indiŋ yobune Youkudip Mede gineŋ youkiŋ. “Meeniŋ Judahi'walaŋ feknit mokit adi du'walaŋ kahaŋ moŋgodapmaneŋ.” ⁹Biyagoŋ hinek, unduŋ doktiŋa Abalahamdi nadisukiliti talik yaliguk uŋakoŋ yaliŋa takalineŋdi adi'walaŋ kahaŋ kahileneŋ.

Nadisukiliti doktiŋa hatihati kahiledok

¹⁰Eŋ Yodoko Mede diniŋ kwanaidi daŋiniŋ hayembune hatineŋ adi yadi hakiniŋ tineŋ. Indiŋku youkiŋ hatak oŋ. “Yodoko Mede youhebet tigiŋ ukabe nemu lahutdok. Nebek niŋdi lahulaak adi yadi hakiniŋ tibaak.” ¹¹Yodoko Mede diniŋ maaneŋ hatibune Bepaŋdi nadiune yomhik dapmaune walandadok tuwot moŋ. Unduŋ doktiŋa mede yendi didimeniŋ hinek yolak. “Nediyeŋ Bepaŋ'walaŋ dawi gineŋ walaniŋ hatibaak adi nadisukilitiniŋ doktiŋa hatihati kahilewaak.” ¹²Yodoko Mede folooŋ adi nadisukilitidok mu yoŋit. Uyadi indiŋ yoŋit. Yodoko Mede keleeŋ kwanaiŋiŋ tubudapmawaakdi kedom hatiluwaak.

Jesu adi inditok tiņa hakinit tuguk

¹³Youkudip Mede niņ indin hatak, “Meenin bem foloņ yehitebiņit adi yadi hakidok gigit.” Biyagoņ kuyoņ, Jesu adi unduņ tiņa indi’walaņ haki nilom-moņgokuk, tiņa Yodoko Mede dinin haki u tumolokutnimguk. ¹⁴Kaņ Jesu Kilisto doktiņa Abalaham dinin kahaņdi meenin hogohogok kedem yehikahaņnewaak. Ala Bepaņdi koom Munabulidok yofafaņguk uyadi nadisukiliti tiņa moņgokam.

Bepaņ’walaņ Yodoko Mededi yofolok medeņiņ tuwot mu kelekulaak

¹⁵Notneye, nu yadi nemek fiili gineņ kamekaaņ yobe. Meenin niņ adi kumuņbene kohoņdikidok gigit yeninguk u nebek niņdi ulaņa wahinjkade mede niņ tuwot mu yobek. ¹⁶Unduņ doktiņa nadisukiliti dinin kohoņdiki adi Abalaham eņ yalakiņindok-ku yeniņit oņ. Yalakiņiye feedok mu yoņit. Kubugoņdok hogok yoņit, uyadi Kilistodok-ku yoņit oņ. ¹⁷Nu indin dok yolat. Bepaņdi koomkwaha nadisukiliti dinin kohoņdiki wondiniņ gigit yoguk, kaņ mindaņkade gulet 430 dapmaune Yodoko Mede yobihikuk. Ala Yodoko Mede^b mindaņ yoņit wendi dedin tiņa gigitmede timen yoņit ulune fowek? U tuwot moņ. ¹⁸Nadisukiliti dinin kohoņdiki uye Yodoko Mede doktiņa moņgotdok hale tuguk binek adi gigitmede doktiņa moņgotdok tuwot mu tibe tuguk. Bepaņ adi yadi nadisukiliti dinin kohoņdiki uyadi siloņniņ doktiņa Abalaham mimiņdok gigit niņguk.

Yodoko Mede adi yagigi hahatdok mu yoņit

¹⁹Kei! Kaņ Yodoko Mede maņgande yoņit? Uyadi mede wobu doktiņa yobihilinjit, ala fafaņeniņ hahatdok moņ. Abalaham’walaņ yalaki, gigitmede dinin molom, mintaune tabadok yoņit. Yodoko Mede uyadi aņelo mahikdi yoņit, tiņa Moses me lekiņgoņnik foloņ nihikiula hatiguk adi’walaņ kohoņ foloņ kameņit. ²⁰Me lufom adi mede yofafaņe titiņdok nadiņa meenin yehikiula me lekiņgoņ hatilak adut kedem tidemek. Ingoņ Bepaņ adi kubugoņ doktiņa ne hogok Abalaham gut yofafaņguk.

Yodoko Mededi meenin welehiik mu tubukaikawaak

²¹Kaņ Yodoko Mededi Bepaņ’walaņ gigitmede kelekulaņa kibikoņ tilak be? Unduņ titiņdok hatuwek binek adi biyagoņ Yodoko Mededi yom tubufikudapmaaņ hatihati fofooņ nimiliwek. ²²Meenin wanakaņ hogohogok kadakanin dinin folok gineņ hatiyam. Mebinik unduņ Youkudip gineņ yobihikin. U biyagoņ kuyoņ, ala Jesu Kilisto nadisukilitimiņa gigitmede dinin folooņ moņgotneem, u hogok hatak.

Koomkwaha adi folok gineņ hatigumun

²³Judahi indi koomkwaha nadisukilitinit mokit hatiyanene Yodoko Mededi nihi-ibiune folok gineņ hakanene nadisukiliti dinin gigitmededi

^b 3:17 Yodoko Mede Mosesdi yemguk wendok Yofolok Komi yoiņ.

mingonj mintahautaguk. ²⁴Unduŋ doktiŋa Yodoko Mededi nihitubu-didimeeŋ Kilisto'walaŋkade nipmeguk, uyadi nadisukilitinit tinene yomnik dapmaune Bepaŋ dut kifolok titiŋdok unduŋ tuguk.

Jesu dut kadiŋa namandap kubugoŋ tugumun

²⁵Indi yadi nadisukiliti diniŋ talik mintaune u takaliŋa unene Yodoko Mededi nihitubu-didime kwanai tuguk u agaŋ dapmalak. ²⁶Kaŋ hidi yadi Jesu Kilisto nadisukilitimiin doktiŋa wanakaŋ hogohogok Bepaŋ'walaŋ wapmihiniye tigiŋ hatiin. ²⁷Imeyout tihamuŋa Kilisto dut hehitomboyoulinit hidi wanakaŋ hogohogok Kilistodi dahidahihik tubune dahiune foguk. ²⁸Kaŋ wendoktiŋa Juda me eŋ Gilik me, loloŋnit eŋ fofonit, me eŋ tam, molomolom hatihati u dapmaune hidi wanakaŋ hogohogok Kilisto Jesu dut kadiŋa kubugoŋ tiin. ²⁹Hidi yadi Kilistodok gigit tigiŋdi Abalaham'walaŋ yalakiŋiye folooŋ hinek hatiin. Unduŋ tiŋa gigitmededi yolak wendok tuwolit kohoŋdiki moŋgo hatineeŋ.

Munabuli hogohidok tipilapilaye tihatigumundi Bepaŋ'walaŋ wapmihiniye tugumun

4 ¹Niŋ indiŋ yobene nadineŋ. Mihi-kabe niŋ adi beu kumiŋ'walaŋ kohoŋdiki u agaŋ molom tilak iŋgoŋ fiit tipilapilaye mihi dabugoŋ hatilak. ²Adi unduŋ hatilune kokon be naŋgat dikiniyedi beu'walaŋ kohoŋdiki u moŋgo bopnemiŋa yabudokolune beudi nai tuguk u dulawek. ³Indi maan undugoŋ hatigumun. Koomkwaha welenikdi ŋakŋak hatiŋjila kwet diniŋ munabuli hogohi noli wendok tipilapilaye kwanai hati tugumun. ⁴Kaŋ mindaŋkade nai tiŋit foloŋgoŋ Bepaŋdi mihiniŋ kameune tam'walaaniŋ mintaŋ Yodoko Mede takaliŋa adi'walaŋ falipmeŋ hatiguk. ⁵Uyadi indi Yodoko Mede diniŋ folok gineniŋ fiyakutnimbune Bepaŋ'walaŋ wapmihiniye titiŋdok unduŋ tuguk. ⁶Kaŋ hidi agaŋ wapmihiniye tigiŋ doktiŋa Bepaŋdi Mihiniŋ diniŋ Munabuli welenik gineŋ niŋkulune foon indiŋ kutibulabulayelak, "O Me Baŋ, Betnik Momoon." ⁷Unduŋ doktiŋa hidi tipilapilaye wapmihi moŋ, adi wapmihiniye hinek hatiin. Ala unduŋ hatiŋjila Bepaŋ'walaŋ silon tobogoŋ doktiŋa kohoŋdiki diniŋ molom hatiin.

Nemek folooŋnit mokit sigilulum timiŋit u kotigoŋ mu udaneŋ kakaŋdok

⁸Hidi koomkwaha Bepaŋ mu nadimiŋa bepaŋ yalayaŋaŋ hatihatihinit mokit adi tipilapilaye tiyem hatiyagiŋ. ⁹Ala mindaŋkade Bepaŋ nadimiŋgiŋ. Foloŋ adi indiŋ. Bepaŋdi nadihamuŋa kutihanambu buŋa nadisukiliti tigiŋ. Hidi undihidi maŋgoŋde kotigoŋ kwet diniŋ munabuli saŋiniŋhinit mokit, eŋ folooŋhinit mokit, adi'walaŋkade wooŋ tipilapilaye tiyemiin? ¹⁰Unduŋ tiŋa gulet mebimebi^c

^c **4:10** Mebop nolidi kayoŋbop yehitomboyoula Judahi'walaŋ titiŋ mebimebi indiŋ keledok gigne tagiŋ: sigihik diniŋ gitnem diki dobukutdok, eŋ melenai uŋgoniŋ eŋ muyakip tiŋa gulet u didimeŋgoŋ keledok yoyagiŋ.

wendok nadiune foloŋ tubune ikiir. ¹¹Kwanainedi hidi'walaŋkade foloŋnit mokit tibaakneŋ yoŋa nadimulap kisaŋ tihatilat.

Galesiyahi adi Pol sigilulum timine tigiŋ

¹²Notneye, nu hanimbulabulayeŋ yobe. Nu hiditok tuwolit tugut doktiŋa hidibo nutok tuwolit tineŋ. Hidi nemek kadakanŋ mu tinamgiŋ. ¹³Nu koom yagit folofigita nadiŋila Mede Momooŋ haniŋgut. U agaŋ nadiiŋ. ¹⁴Kaŋ foloone gweheye mohinek tulugut iŋgoŋ hidi nutok nadihaŋinda mu tigiŋ, eŋ lakata mu tigiŋ. Moŋ, hidi adi nabune Bepaŋ'walaŋ aŋelo niŋ nabugoŋ tugut. Eŋ Kilisto Jesu dabugoŋ tubune naninehimanegiŋ. ¹⁵Ai! nai uŋaniŋ yonadifo tigiŋ u dediŋ tiŋa dapmalak? Hidi dauhik kiliki tamali nu namdok hale tuguk binek kedem undugoŋ tinetigiŋ, iŋgoŋ unduŋ titiŋdok tuwot moŋ doktiŋa mu tigiŋ. Uyadi biyagoŋ nadiŋa yolat. ¹⁶Kaŋ nai indidegoŋ mede foloŋ hanimbe nabune memikhikbe tilat? ¹⁷Meeniŋ noliyeŋ weleyouyout tihamiŋ uyadi nihiulitawa tine tiŋ, ubo kaŋ. Hidi adi yehiulihidok nadisuŋa unduŋ tiŋ. ¹⁸Nemek momooŋ ulihihinaka titiŋdok uyadi kedem. Uyadi wooŋ hidut hatibene hogok moŋ, helemahemaŋ tubune tuwot tibek.

¹⁹Wapmihineye, nu hiditok welefigita adi tamwoidi wapmihi yanagitne folofigita nadiiŋ wondok tuwot nadilat. Tiŋa Kilisto'walaŋ titiŋ mintahinakadok folofigita uyadi uŋgoŋ hati nadiluwaat. ²⁰Nu hidigut hatiliwit binek adi mede momooŋ kedem haniliwit, iŋgoŋ mokoŋ doktiŋa hiditok nadibedi tiŋa dediŋ tiŋa hehitubu-lodawit yoŋa nadilat.

Sela'walaŋ mihi eŋ Haga'walaŋ mihi adi mebihik molomolom

²¹Haninadiwe nanineŋ, Yodoko Mede tipilapilaye timindok yoiŋ, hidi mede wondiniŋ mebi maŋbe nadiiŋ? ²²Biyagoŋ kuyoŋ, uŋoŋ indiiŋ youlinjiŋ. Abalaham'walaŋ mihiyat lufom mintagumuk, niŋ tipilapilaye wabidi nagikuk, eŋ niŋ tamŋiŋ hinekdi nagikuk. ²³Ala tipilapilaye wabidi nagikuk uyadi meeniŋdi mintaiŋ talik gineŋ mintaguk, eŋ tamŋiŋ hinekdi nagikuk adi yadi Bepaŋ'walaŋ gigitmede hakuk wondok tuwolit mintaguk. ²⁴Ala mede wondiniŋ faki indiiŋ hatak. Tamyatdi nemek tugumuk uyadi yofolok mede lufom hakamuk wondiniŋ welewele tugumuk. Yofolok niŋ Sainai kweboboe foloŋ tiŋit, adi'walaŋ kayoŋbop adi tipilapilaye kwanai tigiŋ ala wondiniŋ welewele ye Hagadi tuguk. ²⁵Haga adi Sainai kweboboe, Alabiya kwetneŋ itak, wondiniŋ wou niŋ. Eŋ Jelusalem yokwet adi Sainai kweboboe gut tuwolihik kubugoŋ tiyamuk. Biyagoŋ kuyoŋ, adi'walaŋ kayoŋbop adi tipilapilaye kwanai iŋgoŋ tiŋ. ²⁶Eŋ Jelusalem yokwet niŋ wahiiŋ kunum gineŋ foloknit mokit itak wondi Sela nabugoŋ tilak. Biyagoŋ kuyoŋ, yokwet wondi meenik hinek tilak. ²⁷Youkudip Mede niŋ indiiŋ hatak.

“Tam yamuniŋ tiŋa wapmihi mu yehitubu-mintaguiŋ, du welemomooŋ nadiweŋ.

Wapmihi tubumintadok folofigita mu nadilaŋ, du welemomooŋ nadiŋa nadiŋa tibeŋ.

Tam yohoinit adi wapmihiŋiye lufom-kabe yabudokolak.

Yohoinit mokitdi wapmihi fee yabudokowaak.”

²⁸Notneye, hidi yadi Aisak wele tiŋa gigitmede diniŋ folooŋ mintagiŋ.
²⁹Kaŋ koomkwaha mihi magineŋ mintagukdi Munabuli’walaŋ mede foloŋ mintaguk adi memik timiŋguk. Kamiŋ i kudi undiniŋgoŋ hatak.
³⁰Kaŋ Bepaŋ’walaŋ mededi dediŋ yolak? Tipilapilaye waabi adi mihiŋiŋdut yehikeleкулunе udemeek. “Tipilapilaye waabi diniŋ mihiŋiŋ tamniŋ hinek’walaŋ mihi dut kohoŋdiki wanaŋ mu yabukahilewaak.”
³¹Unduŋ doktiŋa notneye, indi yadi tipilapilaye wabi’walaŋ yalakiŋiye moŋ. Indi yadi tamniŋ hinek’walaŋ yalakiŋiye.

Agan nihifiyakuliŋitdi kotigoŋ folok gineŋ mu fofondok

5 ¹Foloknit mokit hatidok Kilistodi fiyakutnimguk. Unduŋ doktiŋa nebek niŋdi folok gineŋ hapmeŋ tipilapilaye kwanai titiŋdok hanimbune moŋ yeniyaneeŋ. ²Nu Poldi indiŋ hanimbe nadineŋ. Hidi foloohik foloŋ Judahi’walaŋ fek tubune Kilistodi hidi’walaŋkade folooŋnit mokit tibaak. ³Kotigoŋ gineŋeŋ hanihinakawit, nebek niŋ adi folooŋ foloŋ Judahi’walaŋ fek tibaak adi yadi Yodoko Mede hogohogok wanaŋ tilodapmaune tuwot tibaak. ⁴Yodoko Mede tilonene yomnik dapmaŋdok yoiŋ, hidi yadi Kilisto gut yofolok tigiŋ u agan dokolak eŋ siloŋ tobogoŋ u hidi’walaŋkade folooŋnit mokit tilak. ⁵Kaŋ indi yadi Munabuli’walaŋkade ulodikilitiŋa nadisukiliti tinene yomnik dapmandok nadiŋila hatiyam. ⁶Kilisto Jesu’walaŋkade wooŋ feknit hatihati eŋ feknit mokit hatihati u wanaŋ folooŋnit mokit yodok. Nadisukiliti diniŋ kudi adi welesiloŋ mintaune wendok kubugoŋ folooŋ yodok.

Yotubufit me heki’walaŋ buukaŋdi Mede Momoŋ diniŋ ime tilik gineŋ mu fowaak

⁷Hidi Jesu’walaŋ Mede Momoŋ talik gineŋ kedeŋ tububihila yaugiŋ. Yaulune nebek niŋdi kamehep tihambune mede folooŋ hinek sigilulum timiŋgiŋ. ⁸Kwanai hogoli u Bepaŋ’walaŋkade mu mintaguk. Adi yadi hanihehimane tilak. ⁹Kale buukaŋniŋ adi nemek kambaŋgit hinekdi nanaŋe kabot gineŋ foune nanaŋe wanaŋ buukadapmawek. ¹⁰Hidi nu’walaŋ mede mu wabineŋ. Uyadi Wapum doktiŋa hiditok nadibedi mu tiŋa yolat. Eŋ meeniŋ wendi be wendi welehiŋ tubufilaak adi yadi wendiniŋ yomdok kibikoŋ moŋgolaak. ¹¹Notneye, nu yadi meeniŋ Judahi’walaŋ feknit titiŋdok yenimbe tugut binek memik dediŋ tiŋa tinamne tigiŋ? Unduŋ yenimbe tugut adi kolonŋdabekdok nadikadaka u maanŋ dapmawe tuguk. ¹²Welehiŋ eŋ nadinadihiŋk ula tifoŋiŋ, meeniŋ undihiŋ adi sigihik gitnem diki hogok moŋ, folooŋ wanaŋ dobukut titiŋdokbo yoŋ!

Foloknit mokit hatiñila nemek kaka mu titiñdok

¹³Notneye, hidi yadi foloknit mokit hatidok hanihehimanenjit. Ingon on, foloknit mokit hatihatidi yoon tihambune foloohik diniñ mede tilolonok mon, adi welesilonnit kitubuloda titiñdok hanihehimanenjit. ¹⁴Biyagon kuyon, Yodoko Mede kiulaja indin yonit, “Datok nadilanj undugon nokedok nadiluwaan.” ¹⁵Hidi yadi medehikdi tosiwe tiña kiutkiut titawoon liweneeneñ yonja munte mede i hanilat.

Ungoniñ Munabuli’walañ titiñ eñ Wele Komi diniñ titiñ

¹⁶Unduñ doktiña indin yolat, hidi yadi Munabuli’walañ sañiniñ folon ulodikilitiña hatiyaneen. Unduñ tiña welehek komi diniñ siloda kwanai mu tiyaneen. ¹⁷Biyagon kuyon, welehek komi’walañ nadigalikadi Munabuli sikele tilak, eñ Munabulidi welehek komi sikele tilak. Biyagon hinek, adi yadi unduñ tiña mindobu tubune hidi nemek tine yoin u kedem mu lodañ tiñ. ¹⁸Munabulidi hehitubu-lodañ hanagilune Yodoko Mededi me bombonji mu tihambaak.

¹⁹Welehek komi diniñ kwanai u hebihat mu tilak, uyadi indin hatak. Kefifile, timadimadike, tinanadifo, ²⁰kwet yabawen gikiñgon tiyemtiyem, upmun sitnan, mik-kwadi, kinintiñafo, me noli’walañ nemenemekniñ doktiña kanadigalika, kwihita, mede kiyokiyo, danedane, danepupuhene, ²¹yofitet, ime fafañeniñ be kale nanaje wapum nanaj, eñ nemek noli. Nemek undihidok agañ koom haniñgut, ala i kotigonbo hanimbe. Nediyeñdi kadakanin yotafomun u tineen, adi yadi kunum folon Bepañ’walañ hatihati momoon hatak u mu kahileneen.

²²Kañ Munabuli diniñ titiñ adi indin hatak. Welesilon, nadifo, kulema, welekulema, nadiloda, titiñ kedem, mede yoyam u didimeñgon takalitakali, ²³kulemañgon, welenikdi dokoninjon hatihati. Biyagon hinek kuyon, Munabuli diniñ titiñ i yotafoyam i titindok adi kamehep nemu hatak.

²⁴Kilisto Jesudok gigit hatiñ adi yadi hatihatihik komi siloda eñ kadakanin diniñ weleyouyoutnit u agañ kolonodabek folon ulune dapguk. ²⁵Ungoniñ Munabulidi hatihati nimalak, doktiña Ungoniñ Munabuli nadiminene hatihati be titiñnik hogohogok gineñ kedem nihititiñeneune takaliyaneem. ²⁶Sigitiñalo tiña kinintiñafo mu tiyaneem, tiña undugon nemenemek meeniñ noli’walañ wendok yabunadigalika mu tiyaneem.

Kitubuloda tiña kiulihi titiñdok

6 ¹Notneye, meeniñ niñdi gweheyeen kadakanin tubune Munabulinit hatiñ hidi kulemañgon yonadiña meeniñ undiniñ u nintubudidime tiyaneen. Unduñ tiña da mañ tikamanda gineñ gweheyewaanen ala

momoongoŋ diwedakaleeŋ hatiluwaan. ²Nemek hehitubu-malabuda tilak u kitubuloda tiŋa tubulodayaneeŋ, unduŋ tiŋa Kilisto'walaŋ yodoko mede kedem takalineeŋ. ³Meeniŋ niŋ adi nemek folooŋ mu tiŋa netok nadiune loloŋnit tibaak, meeniŋ undiniŋ adi ne'niŋ yalaŋŋiŋ diniŋ mebi yobihilaak. ⁴Unduŋ doktiŋa meeniŋ niŋ adi ne'walaŋ hatihatiniŋ diniŋ mebi kanadi tuluwaak. Ala youtumba mede uyadi netok tiŋa mintawaak, meeniŋ niŋdok tiŋa moŋ. ⁵Kwanai diniŋ malabumuŋ danenjit uyadi molomgoŋ yabudokodok. ⁶Bepaŋ'walaŋ Mede Momoŋ hanindidime tiŋ heki adi yadi nemek mebimebi welesiloŋ tiŋa yemtoi tiyaneeŋ.

Hatigene kougoŋ titiŋnik diniŋ folooŋ beneem

⁷Bepaŋ talamut tinene kibinit mokit halaak, unduŋ nobu yogene. Wadi moŋ hinek! Meeniŋ nediyeŋ kwanai tibaak adi hatigene kwanaiŋiŋ diniŋ folooŋ uŋakoŋ bewaak. ⁸Niŋ adi weleŋ komidok kwanai tibaak adi yadi hatigene weleŋ komi diniŋ folooŋ hamdok gigit tibaak. Eŋ niŋ adi Munabuli'walaŋ kwanai tibaak adi yadi hatigene Munabuli diniŋ folooŋ hatihati fafaŋeniŋ kahilewaak. ⁹Titiŋ momooŋ adi nadilakatanit mokit tiyaneem, ala mu nobu gweheyeneem adi kougoŋ hatigene duhuduhu wapum tubumintaneem. ¹⁰Unduŋ doktiŋa nai hatnimilakneŋgoŋ meeniŋ hogohogok yehitubu-lodayaneem. Unduŋ tiŋila meeniŋ notniye nadisukilitihinit nemek wapumgoŋ tiyemaneem.

Mede yokiliti eŋ yokahaŋ

¹¹Hidi kunat kitili wapum i kanaŋ, nu na'walaŋ kohonedi youhamulat. ¹²Biyagoŋ kuyonŋ, meeniŋ adi nohiye nolidi me didimehi yenindok yoŋa hidi maŋ sigihik foloŋ Judahi'walaŋ fek titiŋdok haniŋgigineiŋ. Adi yadi Kilisto kolonŋdabekniŋdok tiŋa folofigita nadineeneŋ yoŋa unduŋ tiŋ. ¹³Sigihik foloŋ Judahi'walaŋ fek tigiŋ meeniŋ woŋ, nehi adi Yodoko Mede mu takaliŋ. Adi yadi hogok hidi feknit tiŋa adut tomboyoulune nehitoŋ nadiune loloŋnit titiŋdok nadiiŋ.

¹⁴Nu na be, be me noli'walaŋ wohiye u tuwot mu yenintilowit. Mokoŋ. Nu adi Jesu Kilisto wou hogok nintilowit. Biyagoŋ, adi kolonŋdabek foloŋ agaŋ kumuŋguk, doktiŋa nu adi wendok hogok nadifo tilat. Eŋ Jesudi kolonŋdabek foloŋ kwanai tuguk, wendi kwetfoloŋ diniŋ titiŋ kadakanŋ nadinadine gineŋ hakuk u ulukumunguk. Kaŋ wondi nu na agaŋ kolonŋdabek foloŋ kumuŋgut, unduŋ tuguk. Unduŋ doktiŋa nu kotigoŋ kwetfoloŋ diniŋ titiŋ kadakahi u kotigoŋ mu yehikeleeŋ tuluwaat. ¹⁵Foloŋnik foloŋ Judahi'walaŋ feknit hatihati be feknit mokit hatihati wendi folooŋ moŋ. Hatihati kobuli wendi folooŋ tilak. ¹⁶Biyagoŋ kuyonŋ, meeniŋ unduŋ nadi hatiŋ, adi Bepaŋdi siloŋ tobogoŋ tiyembune adi'walaŋkade welekulemadi haliwoŋ halaak, tiŋa Bepaŋdi Isilae metam netok yabukahileguk, adi'walaŋkade maŋ.

¹⁷Yonj adi nebek niŋdibo kwanaimiŋ kotigonj mu nambaak. Nu yadi Wapum'walaŋ kwanai tibene folofigita namgiŋ wondiniŋ wedebit foloone folonj halune kamehatilat.

¹⁸Notneye, Wapumnik Jesu Kilisto'walaŋ silonj tobogonjdi welehik gineŋ hatuwaak. U biyagonj.